

Premier Minister Mike Eman:

Parke di Luz di Warawara formando e identidad cultural di nos pueblo

ORANJESTAD

Tradicionnan popular manera e Parke di Luz na Warawara ta forma e identidad cultural di nos pueblo y como tal Gobierno di Aruba ta di opinion cu cu nan merece e sosten necesario. Cu esey den mente Gabinete Mike Eman a brinda su apoyo na e atraccion den e distrito di Santa Cruz cu diabierna ultimo a habri oficialmente. Prome Minister Mike Eman a asisti na e evento y a sinti masha honra di tabata e invitado di honor di famia Koolman. Esaki ta e grupo cu mas cu 15 aña pasa a bin cu e iniciativa y a desaroya e luga den loke e ta awe. Pidiendo e publico presenta diabierna anochi na Parke di Warawara pa lanta para y aplaudi famia Koolman, Prome Minister Eman a expresa "Cu hopi dedicacion nan a crea un sitio di hopi inspiracion."

For di varios luna atras Prome Minister a bin den contacto y a siña conoce hopi detaye di e Parke di Luz cu tur aña ta bira un di e puntonan di mas importante pa bishita durante e temporada di fin di aña. Asina a tende di e necesidad



Prome Minister Mike Eman masha honra di tabata e invitado di honor di famia Koolman

grandi pa un caminda mas accesibel pa autonan. Awa di yobida cu ta baha for di e sero ta dañá henter e caminda di santo y lamentabelmente tin ta opta pa keda sin pasa na e parke pa cuida nan auto.

Inmediatamente Prome Minister Eman a cuminsa haci e gestionnan necesario y a logra, pa medio di Ministerio di Infraestructura y Departamento di Obran Publico pa duna un solucion definitivo na

e problema. Asina algun siman atras a basha un caminda di asphalt cu ta bay for di e caminda principal di Warawara, subi e sero y pasa banda di e parke y sigui bay. No solamente esnan encarga cu e parke di luz a keda contento cu e trabou haci, pero tambe e bishitantenan. Pa Prome Minister Parke di Luz di Warawara ta un luga hopi special. E ta, manera e mes a bisa e anochi ey "caminda e comunidad di Warawara ta bini hunto, caminda e comunidad di Aruba ta bini hunto pa duna un brasa na otro y disfruta di e dianan di fiesta." Durante henter e luna aki y te ainda den prome dianan di januari, Parke di Luz di Warawara lo ta habri tur anochi pa ricibi bishitantenan cu nan cushina tipico y tambe presentacion di agrupacionnan musica en bibe. □



Pa Prome Minister Parke di Luz di Warawara ta un luga hopi special